

Dikgatiso Tse di Dirisiwang mo Bukaneng ya *Botshelo le Bodiredi*

MAY 6-12

**MATLOTLO A A MO LEFOKONG LA
MODIMO | 2 BAKORINTHA 4-6**

“Ga re Ineele”

(2 Bakorintha 4:16) Jalo ga re ineele, mme le fa motho yo re leng ene kafa ntle a onala, eleruri motho yo re leng ene mo teng o ntšhafadiwa letsatsi le letsatsi.

w04 8/15 25 ¶16-17

Ba Lapile Mme ga ba Ineele

¹⁶ Gone ke boammaaruri gore go botlhokwa thata gore re tlhokomele botsogo jwa rona jwa semoya. Fa re na le kamano e kgolo thata le Jehofa Modimo, re ka nna ra tsenwa ke letsapa mme seo le ka motlha ga se kitla se dira gore re lape go mo obamela. Jehofa ke ene yo o ‘nayang yo o lapileng maatla; le yo o se nang maatla a a boitshegang o dira gore a totelwe ke thata e e feletseng.’ (Isaia 40:28, 29) Moaposetoloi Paulo, yo o neng a iponela boammaaruri jwa mafoko ano o ne a kwala jaana: “Ga re ineele, mme le fa motho yo re leng ene kafa ntle a onala, eleruri motho yo re leng ene mo teng o ntšhafadiwa letsatsi le letsatsi.” —2 Bakorintha 4:16.

¹⁷ Ela tlhoko mafoko a a reng “letsatsi le letsatsi.” Seno se raya gore re dirise se Jehofa a re nayang sone letsatsi le letsatsi. Morongwa mongwe yo o nang le dingwaga di le 43 e le morongwa o ile a nna le dinako tse ka tsone a neng a na le go tsenwa ke letsapa mo mmelele go kgobega marapo. Mme o ne a se ka a ineela. O bolela jaana: “Ke itlwaeditse go tsoaga go sa le gale gore pele ga ke simolola go dira tiro epe fela ke nne le nako ya go rapela Jehofa le go bala Lefoko la gagwe. Go dira jalo letsatsi le letsatsi go nthusitse gore ke kgone go itshoka go tla go fitlha jaanong.” Re ka kgonna go ikaega ka maatla a a re tshegetsang a

ga Jehofa fa e le gore ka metlha, ee “letsatsi le letsatsi,” re a mo rapela le go tlhatlhanya ka dinonono tsa gagwe tse dikgolo le ditsholofetso tsa gagwe.

(2 Bakorintha 4:17) Gone le fa pitlagano e le ya nakwana e bile e le motlhofo, e re bakela kgalalelo ya bokete jo bogolo thata e bile e le e e sa khutleng;

it-1-E 724-725

Boitshoko

Go botlhokwa gore re nne re gopotse tsholofetso ya Modimo ya go tshelela ruri re le batho ba ba se nang bolelo. Tota le fa batho ba ba re bogisang ba ka re bolaya, ba ka se kgone go dira gore re latlhegelwe ke tsholofelo eno. (Bar 5:4, 5; 1Bath 1:3; Tsh 2:10) Mathata a re kopanang le one gompiano ga se a sepe fa a bapisiwa le ditsholofetso tseno tsa Modimo. (Bar 8:18-25) Fa re akanya ka go tshelela ruri, go dira gore mathata a rona, tota le fa a ka nna boima jang, e nne a ‘nakwana e bile a nne motlhofo.’ (2Bak 4:16-18) Go tsaya mathata a rona e le a nakwana go re thusa gore re nne re gopotse ditsholofetso tsa Modimo, gore re se ka ra kgobega marapo re bo re felela re sa tlhole re direla Jehofa Modimo.

(2 Bakorintha 4:18) re ntse re tlhomile matlho a rona, e seng mo dilong tse di bonwang, mme mo dilong tse di sa bonweng. Gonne dilo tse di bonwang ke tsa nakwana, mme dilo tse di sa bonweng ke tse di sa khutleng.

Go Ribolola Matlotlo mo Dikwalong

(2 Bakorintha 4:7) Le fa go ntse jalo, re na le letlotlo leno mo dijaneng tsa letsopa, gore maatla a a fetang a a tlwaelegileng e nne a Modimo mme e seng a a tswang mo go rona.

w12 2/1 28-29

'Itumediseng Jehofa'

David Splane wa Setlhopho se se Laolang o ne a tlotla ka setlhogo seo se se theilweng mo Di-kwalong. (2 Bakorintha 4:7) Letlotlo leno ke eng? A ke kitso kgotsa bothale? Sebui se ne sa re: "Nnyaa. Letlotlo le moaposetoloi Paulo a neng a bua ka lone ke 'bodiredi jono' jwa 'go dira gore boammaaruri bo bonatshege.'" (2 Bakorintha 4:1, 2, 5) Mokaulengwe Splane o ne a gopotsa baithuti gore dikgwedi tse tlhano tse ba neng ba di dirisitse ba ithuta di ne di ba baakanyetsa kabelo e e kgethegileng mo bodireding. Ba tshwanetse go tsaya kabelo eno e le ya bothlokwa thata.

Sebui se ne sa tlhalosa gore 'dijana tsa letsopa' di kaya mebele ya rona ya senama. O ne a tlhalosa kafa sejana sa letsopa se farologaneng ka gone le sejana sa gouta. Dijana tsa gouta di dirisiwa sewelo. Mme dijana tsa letsopa tsone di diretswe go berekisiwa. Fa re ka tsenya letlotlo mo sejaneng sa gouta, re ka nna ra tlhoma mogopolo mo sejaneng le mo letlotlong le le mo go sone ka go tswana. Mokaulengwe Splane o ne a re: "Lona baithuti, ga lo batle go dira gore batho ba lebise tlhokomelo mo go lona. E re ka lo le barongwa, lo batla go lebisa batho kwa go Jehofa. Lo dijana tsa letsopa tsa maemo a a kwa tlase."

(2 Bakorintha 6:13) Jalo, e le go duela ka tsela e e tshwanang—ke bua jaaka ke bua le bana—le lona, pitlologang.

w09 11/15 21 ¶7

Nnang lo Gole mo Loratong Lwa Bokaulengwe

⁷ Go tweng ka rona? Re ka 'pitlologa' jang mo go bontsheng lorato lwa bokaulengwe? Go ka nna motlhofo gore batho ba e leng dithaka kgotsa ba setso se se tshwanang ba utlwane. Batho ba ba ratang boitlosobodutu jo bo tshwanang gantsi ba dirisa nako e ntsi ba le

mmogo. Mme fa dilo tse re ratang go di dira le Bakeresete bangwe di dira gore re se ka ra atamalana le ba bangwe, re tshwanetse go 'pitlologa.' Go ka nna molemo go ipotsa jaana: 'A ga ke atise go ya bodireding kgotsa go itlosa bodutu le bakaulengwe le bokgaityadi ba ke sa ba tlwaelang thata? Fa ke le kwa Holong ya Bogosi, a ga ke buisane thata le batho ba ba sa tswang go kopanela ka gonne ke tsaya gore ba tshwanetse go itshupa pele gore ba ka tshwanelega go nna ditsala tsa me? A ke dumedisa bagolo mmogo le basha mo phuthegong?'

Mmalo wa Baebele

(2 Bakorintha 4:1-15) Ke gone ka moo re sa ineeleng, e re ka re na le bodiredi jono go ya kakutlwelobothoko e re neng ra e bontshiwa; ² mme re baketse dilo tsa boferere tse di tshwanetseng go re tlhabisa ditlhong, re sa tsamaye ka tsietso, le fa e le go kgotlela lefoko la Modimo, mme ka go dira gore boammaaruri bo bonatshege re itshupa re tshwanelega mo segakoloding sengwe le sengwe sa motho mo ponong ya Modimo. ³ Jaanong, fa dikgang tse di molemo tse re di bolelang totatota di siregile, di siregetse ba ba nyelelang, ⁴ ba modimo wa tsamaiso eno ya dilo o fufaditseng megopolo ya ba ba sa dumeleng, gore go bonesa ga dikgang tse di molemo tse di galalelang ka ga Keresete, yo e leng setshwano sa Modimo, go se ka ga ba phatsimela. ⁵ Gonne ga re rere rona, mme re rera Keresete Jesu e le Morena, mme rona re batlhanka ba lona ka ntlha ya ga Jesu. ⁶ Gonne Modimo ke ene yo o neng a re: "A lesedi le phatsime mo lefifing," mme o phatsimile mo dipelong tsa rona go di bonesa ka kitso e e galalelang ya Modimo ka sefatlhego sa ga Keresete. ⁷ Le fa go ntse jalo, re na le letlotlo leno mo dijaneng tsa letsopa, gore maatla a a fetang a a tlwaelegileng e nne a Modi-

mo mme e seng a a tswang mo go rona. ⁸ Re patikwa ka tsela nngwe le nngwe, mme ga re a pitlagana mo re ka se tshikhinyegeng; re akabetse, mme ga se mo re tlhokang kgoro ya botso gotlhelele; ⁹ re a bogisiwa, mme ga re a phuagangwa; re latlhelwa fa fatshe, mme ga re senngwe. ¹⁰ Ka metlha gongwe le gongwe mo mmeleng wa rona re itshoke-la tshwaro e e felelang ka loso e e neilweng Jesu, gore botshelo jwa ga Jesu bo tle bo bonadiwe le mo mmeleng wa rona. ¹¹ Gonne rona ba re tshelang re lebanngwa ka metlha le loso ka ntlha ya ga Jesu, gore botshelo jwa ga Jesu bo bonadiwe le mo mmeleng wa rona o o swang. ¹² Ka gone loso lo a dira mo go rona, mme botshelo mo go lona. ¹³ Jaanong ka gonne re na le moya o le mongwe fela wa tumelo jaaka o go kwadilweng ka one go twe: “Ke ne ka supa tumelo, jalo ka bua,” le rona re supa tumelo mme re a bua, ¹⁴ ka re itse gore yo o neng a tsosa Jesu le rona o tla re tsosa mmogo le Jesu e bile o tla re isa mmogo le lona. ¹⁵ Gonne dilo tsotlhe di ka ntlha ya lona, gore bopelonomi jo bo sa re tshwanelang jo bo neng jwa ntsifadiwa bo tle bo tote ka ntlha ya go ntshiwa ga ditebogo ga ba bantsi thata kgalalelong ya Modimo.

MAY 13-19

MATLOTLO A A MO LEFOKONG LA MODIMO | 2 BAKORINTHA 7-10

“Re Thusa Bakeresete ba ba Wetsweng ke Masetlapelo”

(2 Bakorintha 8:1-3) Jaanong bakaulengwe, re lo itsise ka ga bopelonomi jo bo sa re tshwanelang jwa Modimo jo bo neilweng diphuthego tsa Makedonia, ² gore mo nakong ya teko e kgolo fa ba ne ba bogisega boipelelo jo bogolo jwa bone le lehuma le legolo la

bone di ne tsa dira gore dikhumo tsa bone tsa go aba ka bopelotshweu di tote. ³ Gonne go ya ka se tota ba se kgonang, ee, ke a supa, seno se ne se feta seo tota ba neng ba se kgona,

w98 11/1 25 ¶1

“Modimo o Rata Monei yo o Thamileng”

Sa ntlha, Paulo o ile a bolelela Bakorintha ka batho ba Makedonia, ba ba ileng ba tsibogela kgang ya thuso ya namolo ka tsela e e molemo. Paulo o ne a kwala jaana: “Mo nakong ya teko e kgolo fa ba ne ba le tlase ga pogisego boipelo jo bo letlotlo jwa bone le lehuma le legolo la bone di ne tsa dira gore dikhumo tsa bopelo[tshweu] jwa bone di tote.” Go ne ga se ka ga tlhokega gore batho ba Makedonia ba tlhotlhelediwe go aba. Go na le moo, Paulo o ne a re “bone ka go rata ga bone ba ne ba nna ba re lopa tshiamelo ya go naya ka bopelonomi ba rapela thata.” Bopelotshweu jo batho ba Makedonia ba bo bontshitseng ka boipelo bo a gaggamatsa e re ka le bone ba ne ba le mo ‘lehumeng le legolo.’—2 Bakorintha 8:2-4.

kr 209 ¶1

Bodiredi Jwa Namolo

KE MO e ka nnang ka 46 C.E., mme Judea e aparetswe ke leuba le le maswe. Bajuda ba ba nnang koo ba e leng barutwa ba ga Keresete, ga ba na madi a go reka dijo tse tlhwalhwa ya tsone e leng kwa godimo fela thata. Ba tshwerwe ke tlala e bile ba aparetswe ke letlhoko le legolo. Le fa go ntse jalo, ba tloga ba bona kafa seatla sa ga Jehofa se ba sireletsang ka gone ka tsela e e iseng e ko e diragalele barutwa bape ba ga Keresete. Ke eng se se tlogang se direga?

(2 Bakorintha 8:4) fa bone ka go rata ga bone ba ne ba nna ba re kopa tshiamelo ya go aba ka bopelonomi ba rapela thata le gore ba nne le seabe mo bodireding jo bo laoletsweng baitshepi.

kr 209-210 ¶4-6

Bodiredi Jwa Namolo

⁴ Mo lekwalong la bobedi le Paulo a neng a le kwalela Bakorintha, o ne a tlhalosa gore Bakeresete ba na le bodiredi jo bo dikarolo tse pedi. Le fa gone lekwalo leo la ga Paulo le ne le lebisitswe mo Bakereseteng ba ba tloditsweng, gompiono mafoko a gagwe a dira le mo 'dinkung tse dingwe' tsa ga Keresete. (Joh. 10:16) Karolo nngwe ya bodiredi jwa rona ke "bodiredi jwa tetlanyo," ke gore, tiro ya rona ya go rera le go ruta. (2 Bakor. 5:18-20; 1 Tim. 2:3-6) Karolo e nngwe e akaretsa bodiredi jo re bo direlang badumedimmogo le rona. Paulo o ne a bua ka tlhamalalo ka 'bodiredi jwa namolo.' (2 Bakor. 8:4) Mo makgetlong ano otlhe, lefoko "bodiredi" mo dipolelwaneng "*bodiredi* jwa tetlanyo" le '*bodiredi* jwa namolo,' ke thanolo ya mofuta wa lefoko la Segerika *di-a-ko-ni'a*. Ke eng fa seo se le botlhokwa?

⁵ Fa Paulo a ne a dirisa lefoko le le tshwanang la Segerika mo ditirong tseno tse pedi, o ne a goboka tiro ya namolo le mofuta e mengwe ya bodiredi e e neng e dirwa mo phuthegong ya Bokeresete. O ne a buile jaana pelenyana: "Go na le mofuta e e farologaneng ya bodiredi, mme le fa go ntse jalo go na le Morena a le *mongwe fela*; e bile go na le ditiro tse di farologaneng, . . . Mme . . . di dirwa ke moya o le *mongwe fela*." (1 Bakor. 12:4-6, 11) Tota e bile, Paulo o ne a amanya mofuta e e farologaneng ya bodiredi jo bo dirwang mo phuthegong le "tirelo e e boitshepo." (Bar. 12:1, 6-8) Ga go gakgamatse go bo a ne a bona go tshwanela gore a dirise bontlhanngwe jwa nako ya gagwe "go direla baitshepi!"—Bar. 15:25, 26.

⁶ Paulo o ne a thusa Bakorintha go tlhaloganya lebaka la go bo tiro ya namolo e le karolo ya bodiredi le kobamelo ya bone mo go Jehofa. Ela tlhoko lebaka le a le ba nayang: Bakeresete ba ba namolang ba dira jalo ka gonne ba "ikobela dikgang tse di molemo ka ga Kerese-

te." (2 Bakor. 9:13) Ka jalo, e re ka Bakeresete ba tlhotlhedlwa ke keletso ya bone ya go batla go dirisa dithuto tsa ga Keresete, ba thusa badumedikabone. Paulo o ne a re ditiro tsa bopelonomi tse ba di direlang bakaulengwe ba bone, ruri di bontsha "bopelonomi jo bo sa re tshwanelang jo bogolo thata jwa Modimo." (2 Bakor. 9:14; 1 Pet. 4:10) Ka jalo, fa makasine wa *The Watchtower* wa December 1, 1975, o ne o akgela malebana le go direla bakaulengwe ba rona ba ba humanegileng, e leng se se akaretsang tiro ya namolo, o ne wa bua jaana ka nepo: "Le ka motlha ga re a tshwanela go belaela gore Jehofa Modimo le Morwawe Jesu Keresete ruri ba tsaya tirelo eno e le botlhokwa thata." Eleruri tiro ya namolo ke mofuta o o botlhokwatlhokwa wa tirelo e e boitshepo.—Bar. 12:1, 7; 2 Bakor. 8:7; Baheb. 13:16.

(2 Bakorintha 9:7) A mongwe le mongwe a dire fela jaaka a sweditse mo pelong ya gagwe, e seng ka go ikgoga fela kgotsa ka go patelelwa, gonne Modimo o rata yo o nayang ka boitumelo.

kr 196 ¶10

Kafa Ditiro Tsa Bogosi di Tshegediwang ka Gone ka Madi

¹⁰ Sa ntlha, re ntsha meneelo ka go rata ka gonne re rata Jehofa e bile re batla go dira "dilo tse di itumedisang mo matlhong a gagwe." (1 Joh. 3:22) Ruri Jehofa o itumedisiwa ke moobamedi yo o abang ka go rata go tswa pelong. A re sekasekeng mafoko a ga moaposetoloi Paulo a a amanang le go aba ga Bakeresete. **(Bala 2 Bakorintha 9:7.)** Mokeresete wa boammaaruri ga a abe ka go ikgogona kgotsa ka go patelediwa. Go na le moo, o aba ka gonne a "sweditse mo pelong ya gagwe" go dira jalo. Ke gore, o aba morago ga go sekaseka se se tlhokegang le kafa a ka tsenyang letsogo ka gone go thusa. Jehofa o rata thata motho yo o abang ka tsela e e ntseng jalo, ka gonne "Modimo o rata yo o nayang ka

boitumelo.” Thanolo e nngwe e balega jaana: “Modimo o rata batho ba ba ratang go neela.”

Go Ribolola Matlotlo mo Dikwalong

(2 Bakorintha 9:15) A re lebogeng Modimo ka ntlha ya mpho ya gagwe ya mahala e e ka se kang ya tlhalosiwa.

w16.01 9 ¶2

A ‘Mpho ya Mahala E e Ka se Kang ya Tlhalosiwa’ E a Go Patelela?

² Paulo o ne a itse gore setlhabelo sa ga Jesu se tlhomamisa gore ditsholofetso tsotlhe tsa Modimo di tla diragadiwa. **(Bala 2 Bakorintha 1:20.)** Seno se bontsha gore “mpho . . . ya mahala e e ka se kang ya tlhalosiwa” e Modimo a re nayang yone e akaretsa setlhabelo sa ga Jesu, bomolemo le lorato lo lo ikanyegang lo Jehofa a re bontshang lone. Ga re kgone go tlhalosa le go tlhaloganya ka botlalo mpho eno e e tlhwalhwakgolo. Re tshwanetse go ikutlwa jang ka mpho eno e e kgethegileng? Mme e tshwanetse ya re tlhotlheletsa go dira eng fa re ntse re ipaakanyetsa go gopola loso lwa ga Keresete ka Laboraro, March 23, 2016?

(2 Bakorintha 10:17) “Mme yo o ipelafatsang, a a ipelafatse mo go Jehofa.”

g99 7/8 27

A go Phoso go Ipelafatsa?

Mo Dikwalong Tsa Segerika Tsa Bokeresete, le-*diri kau-kha’o-mai*, le le ranotsweng ka go re “go nna motlotlo, go kgana, go belafala,” le dirisiwa e le selo se se siameng le se se sa siamang. Ka sekai, Paulo o ne a bolela gore re ‘kgane, re thaile mo tsholofelong ya kgalalelo ya Modimo.’ Gape o ne a akantsa jaana: “Yo o ipelafatsang, a a ipelafatse mo go Jehofa.” (Baroma 5:2; 2 Bakorintha 10:17) Seno se raya go nna motlotlo ka Jehofa ka e le Modimo wa rona, go nna le boikutlo jo bo ka dirang gore re kgane ka ntlha ya leina la gagwe le le molemo le kafa re mo itseng ka gone.

Mmalo wa Baebele

(2 Bakorintha 7:1-12) Jalo, e re ka re na le ditsholofetso tseno, baratwa, a re intlafatseng leswe lengwe le lengwe la nama le moya, re itekanedisa boitshepo mo go boifeng Modimo. ² Re amogeleng. Ga re a fosetsa ope, ga re a senya ope, ga re a bapala sepe ka tsela e e sa tshwanelang mo go ope. ³ Ga ke bue seno go lo bona mola-to. Gonne ke buile gale ka re mo dipelong tsa rona ke lona go swa le go tshela le rona. ⁴ Ke na le kgololesego e kgolo ya go bua mo go lona. Ke ipelafatsa thata ka lona. Ke tletse ka kgomotso, ke penologa ka boipelo mo dipogisegong tsotlhe tsa rona. ⁵ Tota e bile, e rile re goroga mo Makedonia, nama ya rona e ne ya se ka ya gololesega, mme re ne ra tswelela re bogisega ka mokgwa mongwe le mongwe—go ne go na le dintwa kafa ntle, dipoifo mo teng. ⁶ Le fa go ntse jalo Modimo, yo o gomotsang ba ba sulafetseng pelo, o ne a re gomotsa ka go nna gone ga ga Tito; ⁷ le fa go ntse jalo e seng ka go nna gone ga gagwe go le gosi, mme le ka kgomotso e a neng a gomoditswe ka yone ka ntlha ya lona, jaaka a ne a re tlisetsa pego gape ka ga go ntlohologelelwa ga lona, go nkhutsa-falela ga lona, go tlhoafala ga lona ka nna; mo ke neng ka ba ka ipela thata. ⁸ Ka gone le fa ke ne ka lo utlwisa botlhoko ka lekwalo la me, ga ke ikwatlhae. Le fa pele ke ne ka ikwatlhaya, (ke a bona gore lekwalo leo le ne la lo utlwisa botlhoko, le fa e ne e le ka lobakanyana,) ⁹ jaanong ke a ipela, e seng ka gonne lo ne lwa utlwa botlhoko fela, mme ka gonne lo ne lwa utlwa botlhoko mo lo neng lwa ikwatlhaya; gonne lo ne lwa utlwa botlhoko ka tsela ya bomodimo, gore lo tle lo se ka lwa senyegelwa mo go sepe ka ntlha ya rona. ¹⁰ Gonne kutlobotlhoko ka tsela ya bomodimo e dira gore go nne le boikwatlhao

jo bo isang polokong mo go sa tshwane-
lang go ikwatlhaelwa; mme kutlobotlhoko ya
lefatshe e tsala loso. ¹¹ Gonne, bona! sone
selo seno, go utlwa botlhoko ga lona ka tsela
ya bomodimo, a bo go ne ga tsala tlhoafalo
e kgolo jang ne mo go lona, ee, go intlafa-
tsa, ee, bogale, ee, poifo, ee, tlhologelelo, ee,
tlhoafalo, ee, go baakangwa ga phoso! Ka
ditsela tsotlhe lo ne lwa ipontsha lo itsheki-
le mo kgannyeng eno. ¹² Eleruri, le mororo ke
ne ka lo kwalela, ke ne ka dira jalo, ke sa di-
rele yo o neng a dira phoso, le fa e le yo o
neng a fosediya, mme gore tlhoafalo ya lona
ka rona e tle e bonadiwe mo go lona mo po-
nong ya Modimo.

MAY 20-26

MATLOTLO A A MO LEFOKONG LA MODIMO | 2 BAKORINTHA 11-13

“Paulo O ne A na Le ‘Mutlwa mo Nameng’”

(2 Bakorintha 12:7) fela ka ntlha ya ditshe-
nolo tse di feteletseng. Jalo, gore ke se ka
ka ikutlwa ke godisitswe go feta selekanyo,
ke ne ka tsenngwa mutlwa mo nameng, moe-
ngele wa ga Satane, gore a nne a mphantse,
gore ke se ka ka godisiwa go feta selekanyo.

w08 6/15 3-4

Go Nna Maatla Le fa Re na Le Makoa

Motlhanka yo mongwe yo o ikanyegang o ne a
kopa Jehofa gore a tlose ‘mutlwa mo nameng
ya gagwe,’ e leng bothata bongwe jo bo neng
bo mo tshwenyeditse ruri. Moaposetoloi Paulo
o ne a kopa Modimo gararo gore a mo golole
mo bothateng jono. Le fa bothata jono jo bo
jaaka mutlwa o o botlhoko e ka tswa e ne e le
bofe, bo ka tswa bo ne bo dira gore Paulo a
se ka a itumela mo tirelong ya ga Jehofa. Paulo
o ne a bo tshwantsha le go nna a phantshiwa.
Jehofa o ne a mo araba a re: “Bopelonomi jwa
me jo bo sa go tshwanelang bo go lekane; go-

nne maatla a me a a bo a tletse mo bokoeng.”
Jehofa ga a ka a tlosa mutlwa oo mo nameng
ya ga Paulo. Paulo o ne a tshwanelwa ke go
lwa le one, mme o ne a re: “Fa ke le bokoa, ke
gone ke leng maatla.” (2 Bakor. 12:7-10) O ne
a rayang fa a rialo?

(2 Bakorintha 12:8, 9) Ke ne ka rapela Mo-
rena gararo ka seno gore o tloge fa go nna;
⁹ mme le fa go ntse jalo tota o ne a nthaya a
re: “Bopelonomi jwa me jo bo sa go tshwane-
lang bo go lekane; gonne maatla a me a a bo
a tletse mo bokoeng.” Jalo, ke ka mpa ka
ipelafatsa ka makoa a me ka go itumela tha-
ta, gore maatla a ga Keresete a tle a nnele
ruri mo go nna jaaka mogope.

w06 12/15 24 ¶17-18

Jehofa o ‘Naya Ba ba Mo Kopang Moya o o Boitshepo’

¹⁷ Modimo o ne a araba dithapelo tsa ga Pau-
lo ka go mo raya a re: “Bopelonomi jwa me jo
bo sa go tshwanelang bo go lekane; gonne
maatla a me a a bo a tletse mo bokoeng.” Pau-
lo o ne a re: “Jalo, ke ka mpa ka ipelafatsa ka
makoa a me ka go itumela thata, gore maa-
tla a ga Keresete a tle a nnele ruri mo go
nna jaaka mogope.” (2 Bakorintha 12:9; Pesa-
lema 147:5) Ka jalo, Paulo o ne a bona gore ka
Keresete, tshireletso e e maatla ya Modimo e
ne e mo okame jaaka mogope. Gompieno, Je-
hofa o araba dithapelo tsa rona ka tsela e
e tshwanang. O tsharolola tshireletso ya ga-
gwe jaaka mogope mo godimo ga batlhanka
ba gagwe.

¹⁸ Gone ke boammaaruri gore mogope ga o
kganele pula go na kgotsa phefo go foka,
mme gone o sireletsa motho go se kae mo
dilog tseo. Ka tsela e e tshwanang, tshirele-
tso ya “maatla a ga Keresete” ga e thibele
diteko kgotsa mathata go re wela. Le fa go
ntse jalo, gone e re naya tshireletso ya semo-
ya mo dilong tse di kotsi tsa lefatshe leno le

mo ditlhaselong tsa mmusi wa lone, Satane. (Tshenolo 7:9, 15, 16) Ka jalo, tota le fa o lebane le teko e e sa 'tlogeng fa go wena,' o ka tlhomamisega gore Jehofa o itse bothata jo o mo go jone le gore o arabile "modumo wa selelo sa gago." (Isaia 30:19; 2 Bakorintha 1:3, 4) Paulo o ne a kwala a re: "Modimo o a ikanyega, e bile ga a na go lo lesa lo raelwa go feta se lo ka se itshokelang, mme mmogo le thaelo gape o tla dira tsela ya go tswa gore lo kgone go e itshokela."—1 Bakorintha 10:13; Bafilepi 4:6, 7.

(2 Bakorintha 12:10) Jalo ke itumedisiwa ke makoa, ke ditlhapatso, ke go tlhoka, ke dipogiso le mathata, ka ntlha ya ga Keresete. Gonne fa ke le bokoa, ke gone ke leng maatlata.

w18.01 9 ¶8-9

"O Naya yo o Lapileng Maatla"

8 Bala Isaia 40:30. Le fa re ka tswa re na le bokgoni go le kana kang, ga re ka ke ra kgona go dira sengwe le sengwe ka maatla a rona fela. Rotlhe re tshwanetse go gopola ntlha eno. Le fa moaposetoloi Paulo a ne a na le bokgoni, o ne a na le makoa a a neng a mo thibela go dira dilo dingwe tse a neng a batla go di dira. Fa a bolelela Modimo mathata a gagwe, o ne a mo araba jaana: "Maatla a me a a bo a tletse mo bokoeng." Paulo o ne a tshwara ntlha. O ne a re: "Fa ke le bokoa, ke gone ke leng maatla?" (2 Bakor. 12:7-10) O ne a raya jang?

9 Paulo o ne a itse gore a ka se kgone go dira dilo dingwe fa a sa thusiwe ke Modimo. Modimo o ne a naya Paulo maatla a dirisa moya o o boitshepo. Mo godimo ga moo, moya wa Modimo o ne wa naya Paulo maatla a go dira dilo tse a neng a se kitla a kgona go di dira ka maatla a gagwe. Modimo a ka re thusa ka tselae e e tshwanang. Eleruri fa Jehofa a re naya moya o o boitshepo, re tla nna le maatla!

Go Ribolola Matlotlo mo Dikwalong

(2 Bakorintha 12:2-4) Ke itse motho yo o seoposengwe le Keresete yo, dingwaga tse di lesome le bonè tse di fetileng—e ka ne a le mo mmeleng ga ke itse, kgotsa a se mo mmeleng ga ke itse; Modimo o a itse—a neng a phamolelwa a ntse jalo kwa legodimong la boraro. ³ Ee, ke itse motho yo o ntseng jalo—e ka ne a le mo mmeleng kgotsa kwantle ga mmele, ga ke itse, Modimo o a itse—⁴ gore o ne a phamolelwa kwa paradaiseng a ba a utlwa mafoko a a sa buegeng a go seng kafa molaong gore motho a a bue.

w18.12 8 ¶10-12

Dipotso Tse di Tswang Kwa Babading

'Legodimo la boraro' le go buiwang ka lone mo go 2 Bakorintha 12:2 go bonala e le Puso ya Bomesia e e busiwang ke Jesu Keresete le ba ba 144 000, e leng "magodimo a masha." —2 Pet. 3:13.

Ke 'legodimo la boraro' ka gonne Bogosi joo bo tlhomologile e bile ke puso ya maemo a a kwa godimo.

Go bonala 'paradise' e Paulo a ileng a "phamolelwa" kwa go yone mo ponatshelong e le (1) Paradise ya mmatota e e tla nnang gone mo lefatsheng, (2) kagiso ya Modimo e e tla nnang gone ka nako eo, e e tla bong e feta e re setseng re na le yone gone jaanong, le (3) 'paradise ya Modimo' kwa legodimong e e tla nnang gone ka nako e le nngwe le lefatshela le lesa le re le solofeditsweng.

(2 Bakorintha 13:12) Dumedisanaang ka katlo e e boitshepo.

it-2-E 177

Go Atlana

"Katlo e e Boitshepo." Bakeresete ba ntlha ba ne ba dumedisana ka "katlo e e boitshepo" (Bar 16:16; 1Bak 16:20; 2Bak 13:12; 1Bath 5:26) kgotsa ka "katlo ya lorato." (1Pe 5:14) Fa

bokgaitsadi ba kopana le bokgaitsadi kgotsa bakaulengwe ba kopana le bakaulengwe ba ne ba atlana. Tsela e Bakeresete bano ba neng ba dumedisana ka yone, e ka tswa e ne e tshwana le tsela e Bahebera ba neng ba dumedisana ka yone bogologolo. Le fa Baebele e sa tlhalose gore “katlo e e boitshepo” kgotsa “katlo ya lorato” e ne e kaya eng, go lebega e ne e supa gore maloko a phuthego ya Bakeresete a ne a utlwana e bile a ratana.—Joh 13:34, 35.

Mmalo wa Baebele

(2 Bakorintha 11:1-15) Ke eletsa e kete lo ka intshokela mo go tlhokeng ga me go nna tekatekano. Mme, tota e bile, lo a intshokela! ² Gonne ke fufega ka lona ka lefufa la bomodimo, gonne nna ka namana ke ne ka lo solofetsa go nyalwa ke monna a le mongwe gore ke tle ke lo ise lo le kgarebane e e itshekileng kwa go Keresete. ³ Mme ke boifa gore ka tsela nngwe, jaaka noga e ne ya faposa Efa ka boferere jwa yone, mego-polo ya lona e ka nna ya senngwa ya tswa mo bopeloephepeng le mo boitshekong tse di tshwanetseng Keresete. ⁴ Gonne, kafa go ntseng ka gone, fa mongwe a tla mme a rera Jesu o sele go na le yo re neng ra mo rera, kgotsa lo amogela moya o sele go na le o lo neng lwa o amogela, kgotsa dikgang tse di molemo di sele go na le tse lo neng lwa di amogela, lo mo itshokela motlhofo. ⁵ Gonne ke tsaya gore le mo selong se le sengwe fela ga ke a itshupa ke le wa maemo a a kwa tla-se mo baaposetoloing ba lona ba ba molemo go feta selekanyo. ⁶ Mme le fa ke se setswerere mo puong, eleruri ga ke a nna jalo mo kitsong; mme re ne ra e bonatsa mo go lona ka tsela nngwe le nngwe mo dilong tsotlhe. ⁷ Kgotsa a ke ne ka dira bolelo ka go ikobetsa gore lo godisiwe, ka gonne kwantle ga tuelo ke lo boleletse dikgang tse di molemo tsa Modimo ka go itumela? ⁸ Diphuthego

tse dingwe ke ne ka di thukutha ka go amogela ditlamelo e le gore ke tle ke lo direle; ⁹ mme le fa go ntse jalo fa ke ne ke na le lona mme ke tlhoka sengwe, ke ne ka se ka ka nna mokgweleo le mo go a le mongwe, gonne bakaulengwe ba ba neng ba tswa kwa Makedonia ba ne ba tlamela go tlhaelwa ga me thata. Ee, ka tsela nngwe le nngwe ke ne ka ipoloka ke se mokgweleo mo go lona e bile ke tla ipoloka ke ntse jalo. ¹⁰ Ke boammaaruri jwa ga Keresete mo go nna gore ruri ga go se se tla thibelang go ipelafatsa mono ga me mo dikgaolong tsa Akaia. ¹¹ Ka lebaka lefe? Ka gonne ke sa lo rate? Modimo o a itse gore ke a lo rata. ¹² Jaanong se ke se dirang ruri ke tla nna ke se dira, gore ke tle ke kgaole seipato mo go ba ba batlang seipato sa gore ba fitlhelwe ba lekana le rona mo maamong a ba ipelafatsang ka one. ¹³ Gonne batho ba ba ntseng jalo ke baaposetoloi ba maaka, badiri ba ba tsiet-sang, ba ba iphetolang baaposetoloi ba ga Keresete. ¹⁴ Mme ga go gakgamatse, gonne Satane ka boene o nna a iphetola moengele wa lesedi. ¹⁵ Jalo ga se sepe se segolo fa badiredi ba gagwe le bone ba nna ba iphetola badiredi ba tshiamo. Mme bokhutlo jwa bone bo tla nna kafa ditirong tsa bone.

MAY 27–JUNE 2

MATLOTLO A A MO LEFONG LA MODIMO | BAGALATIA 1-3

“Paulo O ne A Kgalemela Petere”

(Bagalatia 2:11-13) Le fa go ntse jalo, e rile Kefase a tla mo Antioka, ka emelana le ene re lebane difatlhego, ka gonne o ne a le molato. ¹² Gonne pele ga banna bangwe ba goroga ba tswa kwa go Jakobe, o ne a tle a je le batho ba ditšhaba; mme e rile ba goroga, a simolola go ikgoga a ba a itomolola, a boifa ba setlhophsa sa ba ba rupileng. ¹³ Ba-

juda ba bangwe botlhe le bone ba kopanela le ene mo boitshemong jono, mo e leng gore le eleng Barenabase o ne a kopanela le bone mo boitshemong jwa bone.

w17.04 27 ¶16

A o Leba Tshiamiso Jaaka Jehofa a e Leba?

¹⁶ **Bala Bagalatia 2:11-14.** Petere o ne a boifa batho. (Dia. 29:25) Le fa Petere a ne a itse gore Jehofa o akanyang ka kgang eno, o ne a tshaba gore Bakeresete ba Bajuda ba phuthego ya kwa Jerusalema ba tla reng fa ba mmona a itsalanya le Baditšhaba. Moaposetoloi Paulo yo le ene a neng a le teng kwa kokoanong eo ya 49 C.E., o ne a ya kwa go Petere kwa Antioka mme a senola boitimokanyi jwa gagwe. (Dit. 15:12; Bagal. 2:13, *Baebele e e Boitshemo*) Baditšhaba ba Bakeresete ba ba ileng ba utlwiwa botlhoko ke se Petere a se dirileng ba ne ba tla itshwara jang? A ba ne ba tla kgopiseka? A Petere o ne a tla latlhegelwa ke ditshiamelo tsa gagwe ka ntlha ya phoso e a neng a e dirile?

(Bagalatia 2:14) Mme e rile ke bona gore ba ne ba sa tsamaye ka tthamalalo go ya ka boammaaruri jwa dikgang tse di molemo, ka raya Kefase fa pele ga bone botlhe ka re: “Fa wena, le fa o le Mojuda, o tshela jaaka ditšhaba di tshela, mme e seng jaaka Bajuda, go tla jang gore o bo o patelela batho ba ditšhaba go tshela go ya ka tlwaelo ya Sejuda?”

w13 3/15 5 ¶12

Ba ba Ratang Jehofa “Ga ba Na Sekgopi”

¹² Ka dinako dingwe Petere o ne a boifa batho mme seo sa dira gore a kgopiwe; le fa go ntse jalo, o ne a nna a ikanyega mo go Jehofa le Jesu. Ka sekai, o ne a itatola mong wa gagwe phatlalatsa gararo, e seng gangwe fela. (Luke 22:54-62) Moragonyana Petere o ne a palelwa ke go itshwara jaaka Mokeresete, o ne a tshwara badumedi ba Baditšhaba jaaka e

kete ke ba maemo a a kwa tlase mo Bakereseteng ba Bajuda ba ba rupisitsweng. Mme gone, moaposetoloi Paulo o ne a bona dilo ka tsela e e farologaneng—phuthego e ne e se lefelo la go tlhaolana go ya ka maemo. Tsela e Petere a neng a itshwara ka yone e ne e le phoso. Pele ga boitshwaro joo jwa ga Petere bo ka kgopisa bakaulengwe, Paulo o ne a mo kgalemela ka tthamalalo. (Bagal. 2:11-14) A Petere o ne a kgopisiwa ke kgakololo eo mo a neng a se ka a tswelela ka lobelo lwa botshelo? Le eseng. O ne a tsaya kgakololo ya ga Paulo masisi, a e dirisa mme a tswelela ka lobelo lwa botshelo.

Go Ribolola Matlotlo mo Dikwalong

(Bagalatia 2:20) Ke bapotswe mmogo le Keresete. Ga e tshole e le nna yo ke tshelang, mme ke Keresete yo o tshelang a le seoposengwe le nna. Eleruri, botshelo jo jaanong ke bo tshelang mo nameng ke bo tshela ka tumelo e e ka ga Morwa Modimo, yo o nthatileng a ba a ineela ka ntlha ya me.

w14 9/15 16 ¶20-21

Direla Modimo ka Boikanyegi Le fa Go na Le “Dipitlagano di le Dintsi”

²⁰ Go tweng ka ditlhaselo tse di bofitlha? Ka sekai, re ka lwantsha jang maikutlo a go kgobega marapo? Nngwe ya ditsela tse di atlegang thata tsa go dira jalo ke go tlhatlhanya ka thekololo. Ke sone se moaposetoloi Paulo a ileng a se dira. O ne a itse kafa a neng a tle a iku-tlwe ka teng—e se motho wa sepe. Mme gape o ne a itse gore Keresete ga a swela batho ba ba itekanetseng, o swetse baleofi. Mme Paulo e ne e le mongwe wa baleofi bao. Tota e bile o ne a kwala a re: “Ke . . . tshela ka tumelo e e ka ga Morwa Modimo, yo o *nthatileng* a ba a ineela ka ntlha ya *me*.” (Bagal. 2:20) Ee, Paulo o ne a amogetse thekololo. O ne a dumela gore thekololo e ama ene ka namana.

²¹ Go leba dilo ka tsela eo—go tsaya thekololo e le mpho ya *gago* e e tswang kwa go Jehofa

—go ka go thusa thata. Seno ga se kaye gore go kgobega marapo go tla fela ka ponyo ya lei-tlho. Bangwe ba rona re ka nna ra tshwanelwa ke go lwantsha tlhaselo eno e e bofitlha go fitlha kwa lefatsheng le lesa. Mme gopola seno: Tuelo e tla bonwa ke ba ba sa ineeleng. Re gaufi thata le letsatsi le le galalelang le ka lone Bogosi jwa Modimo bo tla tlhomang kagiso mme batho botlhe ba ba ikanyegang ba boe ba itekanele gape. Ititeye sehuba gore o tsene mo Bogosing joo—le fa o ka tsena ka dipitlagano tse dintsi jang.

(Bagalatia 3:1) Lona Bagalatia ke lona ba lo se nang tlhaloganyo, ke mang yo o lo tse-ntseng mo tlhotlheletsong e e bosula, lona ba Jesu Keresete a neng a tshwantshiwa fa pele ga matlho a lona mo pontsheng a bapotswe?

it-1-E 880

Lekwalo le le Kwaletsweng Bagalatia

Fa Paulo a ne a re, “Bagalatia ke lona ba lo se nang tlhaloganyo,” o ne sa bue le batho ba lotso lo lo rileng ba kwa bokone jwa Galatia. (Bag 3:1) Go na le moo, Paulo o ne a kgalema bangwe mo diphuthegong tsa kwa Galatia ba ba neng ba itetla gore ba tshwaediwe ke Bajuda ba ba neng ba dumela gore ba ka bolokwa fela fa ba tshela ka Molao wa ga Moshe, go na le go nna le tumelo mo kgolaganong e ntšha. (2:15–3:14; 4:9, 10) “Diphuthego tsa Galatia” (1:2) di ne di na le batho ba ditso tse di farologaneng go akaretsa Bajuda, baditšhaba ba ba rupisitsweng le ba ba sa rupang, mmogo le Ba-Celt ba ba neng ba tswa kwa bophirima jwa Yuropa. (Dit 13:14, 43; 16:1; Bag 5:2) Bakeresete bano ba ne ba bidiwa Bagalatia ka gonne ba ne ba nna mo kgaolong e e bidiwang Galatia. Tsela e Paulo a kwadileng lekwalo leno ka yone, e supa fa a ne a kwalela batho ba a tlwaelaneng le bone, ba ba neng ba nna kwa kgaolong e e kwa borwa jwa Roma. Paulo o ne a sa kwalele batho ba ba nnang kwa kgaolong

e e kwa bokone ka gonne o ne a ise a etele koo e bile o ne a sa ba itse.

Mmalo wa Baebele

(Bagalatia 2:11-21) Le fa go ntse jalo, e rile Kefase a tla mo Antioka, ka emeelana le ene re lebane difatlhego, ka gonne o ne a le molato. ¹² Gonne pele ga banna bangwe ba goroga ba tswa kwa go Jakobe, o ne a tle a je le batho ba ditšhaba; mme e rile ba goroga, a simolola go ikgoga a ba a itomolola, a boifa ba setlhopho sa ba ba rupileng. ¹³ Bajuda ba bangwe botlhe le bone ba kopanela le ene mo boitshemong jono, mo e leng gore le eleng Barenabase o ne a kopanela le bone mo boitshemong jwa bone. ¹⁴ Mme e rile ke bona gore ba ne ba sa tsamaye ka tlhamalalo go ya ka boammaaruri jwa dikgang tse di molemo, ka raya Kefase fa pele ga bone botlhe ka re: “Fa wena, le fa o le Mojuda, o tshela jaaka ditšhaba di tshela, mme e seng jaaka Bajuda, go tla jang gore o bo o patelela batho ba ditšhaba go tshela go ya ka tlwaelo ya Sejuda?” ¹⁵ Rona ba re leng Bajuda ka tlhologo, mme re se baleofi ba ba tswang mo ditšhabeng, ¹⁶ re itse jaaka re itse gore motho o bolelwa e le yo o siameng, e seng ka ntlha ya ditiro tsa molao, fa e se fela ka tumelo ka ga Keresete Jesu, le eleng rona re dumetse mo go Keresete Jesu, gore re tle re bolelwe re le ba ba siameng ka ntlha ya tumelo ka ga Keresete, mme e seng ka ntlha ya ditiro tsa molao, ka gonne ga go na nama epe e e tla bolelwang e le e e siameng ka ditiro tsa molao. ¹⁷ Jaanong rona, fa re batla go bolelwa re le ba ba siameng ka Keresete, mme le rona re fitlhetswe re le baleofi, a totatota Keresete ke modiredi wa bolelo? E kete seo se ka se diragale le ka motlha! ¹⁸ Gonne fa tsone dilo tse ke kileng ka di digela fa fatshe ke di aga gape, ke itshupa ke le yo o tlolang molao. ¹⁹ Mme nna, ka mo-

lao ke ne ka swa malebana le molao, gore ke tle ke tshela malebana le Modimo. ²⁰ Ke bapotswe mmogo le Keresete. Ga e tlhole e le nna yo ke tshelang, mme ke Keresete yo o tshelang a le seposengwe le nna. Eleruri, botshelo jo jaanong ke bo tshelang mo nameng ke bo tshela ka tumelo e e ka ga Morwa Modimo, yo o nthatileng a ba a ineela ka ntlha ya me. ²¹ Ga ke kgaphele bopelonomi jo bo sa re tshwanelang jwa Modimo kwa thoko; gone fa e le gore tshiamo e teng ka molao, Keresete tota o swetse lefela.